

Jangan ambil rasuah, jaga integriti - Tengku Hassanal

04 Ogos 2023 07:02pm Masa membaca: 3 minit



Pemangku Raja Pahang Tengku Hassanal Ibrahim Alam Shah Al-Sultan Abdullah pada Istiadat Pengurniaan Darjah Kebesaran dan Pingat Negeri Pahang Sempena Memuliakan Ulang Tahun Hari Keputeraan Ke-64 Sultan Pahang di Istana Abu Bakar hari ini. - Foto Bernama

PEKAN - Pemangku Raja Pahang, Tengku Hassanal Ibrahim Alam Shah Al-Sultan Abdullah Ri'ayatuddin Al-Mustafa Billah Shah pada Jumaat mengingatkan agensi penguatkuasaan di Pahang supaya tidak mengambil rasuah dan sentiasa menjaga integriti mereka.

Baginda bertitah, agensi berkenaan perlu menjalankan penguatkuasaan dengan bersungguh-sungguh selain bertindak tegas termasuk dalam usaha memastikan alam sekitar, flora dan fauna di Pahang sentiasa terjaga.

"Saya ada bersama anda, jangan risau. Jangan ambil rasuah dan sentiasa jaga integriti, jika ada yang jual nama sembahkan kepada saya. Tiada yang kebal daripada undang-undang, yang salah tetap salah, tidak kira kerabat, orang politik mahupun rakyat.

"Kepada semua ahli kerabat, segala projek berbentuk usaha sama dengan kerabat negeri lain mesti mendapat perkenan saya terlebih dahulu...begitu juga kepada semua ahli politik, projek pembangunan perlu disembah maklum dan mohon perkenan daripada saya," titah baginda.

Baginda bertitah demikian semasa menyampaikan Titah Diraja pada Istiadat Pengurnian Darjah Kebesaran dan Pingat Negeri Pahang bersempena Memuliakan Ulang Tahun Hari Keputeraan Yang Ke - 64 Sultan Pahang di Istana Abu Bakar, di sini pada Jumaat.

Yang di-Pertuan Agong Al-Sultan Abdullah Ri'ayatuddin Al-Mustafa Billah Shah dan Raja Permaisuri Agong Tunku Azizah Aminah Maimunah Iskandariah berkenan mencemar duli berangkat ke majlis santapan yang berlangsung selepas istiadat pengurniaan.

Selain itu, Tengku Hassanal bertitah, Kerajaan Persekutuan perlu mendapatkan kelulusan daripada Kerajaan Negeri Pahang terlebih dahulu berhubung sebarang projek pembangunan.

"Kepada Jabatan Alam Sekitar pula, saya mahu laporan Penilaian Kesan Kepada Alam Sekeliling (EIA) disebarkan maklum terlebih dahulu sebelum sebarang keputusan dibuat. Kesemua isu dan projek yang disebarkan maklum akan saya sampaikan ke sisi ayahanda (Al-Sultan Abdullah) untuk mendapat perkenan," titah baginda.

Sebagai pewaris takhta negeri Pahang, Tengku Hassanal bertitah baginda, tidak berhasrat untuk campur tangan dalam urusan pentadbiran kerajaan, namun mahu menjadi pihak berkepentingan utama dalam melaksanakan semak dan imbang kepada pembangunan yang akan dilaksanakan.

"Saya mahu prosedur ini terus dilaksanakan walaupun ketika saya menjadi Tengku Mahkota semula agar semua pembangunan yang dirancang akan memberikan manfaat yang terbaik kepada rakyat dan alam sekitar kekal lestari," titah baginda.

Ketika bertitah, Tengku Hassanal turut menyentuh mengenai sentimen 3R iaitu agama, institusi diraja dan kaum yang menjadi kebimbangannya selain bertegas tidak akan sesekali membenarkan mana-mana pihak memainkan isu berkenaan di Pahang.

Selain itu, baginda turut menzahirkan ucapan tahniah kepada 104 penerima darjah kebesaran dan pingat hari ini serta mengingatkan mereka supaya tidak lupa diri, sombong, riak dan angkuh.

"Saya tidak akan teragak-agak untuk menarik semula darjah kebesaran yang telah dikurniakan sekiranya terdapat salah laku dalam kalangan penerima," titah Tengku Hassanal.

Sementara itu, Menteri Besar Pahang, Datuk Seri Wan Rosdy Wan Ismail ketika membacakan ucapan sembah ikrar taat setia berkata Al-Sultan Abdullah menunjukkan keperibadian mulia apabila sering berdampingan dengan rakyat tanpa protokol ketat.

Malah Wan Rosdy berkata, menerusi Yayasan Al-Sultan Abdullah, baginda telah berkenan mengurniakan rumah secara percuma kepada rakyat yang terpaksa menanggung kesusahan disebabkan kediaman mereka rosak atau musnah akibat bencana selain rumah yang terlalu usang dan tidak boleh didiami lagi.

"Sifat mulia Al-Sultan Abdullah telah terserlah diwarisi oleh Pemangku Raja Pahang yang sentiasa berdampingan dengan rakyat serta bertanya khabar dan turut menyantuni mereka dalam apa jua keadaan," katanya. - Bernama